

## SAMÞYKKT

### fyrir Veidifélag Fljótavíkur.

#### 1. gr.

Félagið heitir Veidifélag Fljótavíkur, í Fljótavík, Norður-Ísafjarðarsýslu.

#### 2. gr.

Heimili þess og varnarþing er á Ísafirði.

#### 3. gr.

Félagsmenn eru skráðir eigendur þeirra jarða, sem land eiga að Fljótinu (Fljótavíkurvatni) og Reiða en þær eru: Atlastaðir, Tunga, Glúmsstaðir og Geirmundarstaðir.

#### 4. gr.

Verkefni félagsins er að viðhalda góðri fiskgengd á félagssvæðinu og stuðla að sjálfbærri nýtingu fiskstofna. Félagið tekur til allrar veiði á félagssvæðinu og ráðstafar henni í samræmi við samþykkt félagsfundar. Til að slík framkvæmd nái fram að ganga þarf atkvæði 2/3 atkvæðisbærra fundarmanna og skal geta þess í fundarboði að slík ákvörðun liggja fyrir fundinum. Félaginu ber einnig að vernda vistkerfi vatnafiska á félagssvæðinu og koma í veg fyrir að verklegar framkvæmdir eða önnur starfsemi skaði lífríki þess. Félaginu er heimilt að stunda fiskrækt í samræmi við gilda fiskræktaráætlun á hverjum tíma.

#### 5. gr.

Stjórn félagsins skipa 3 menn, formaður og tveir meðstjórnendur. Skulu þeir kosnir á aðalfundi til þriggja ára í senn. Stjórnarmenn skulu eiga aðild að félaginu eða starfa í umboði þeirra sem getið er í 3. gr. Enginn atkvæðisbær félagsmaður getur skorast undan endurkosningu nema sérstök forföll hamli eða að hann hafi verið í stjórn í þrjú ár. Kjósa skal tvo varamenn og tvo endurskoðendur til þriggja ára í senn.

#### 6. gr.

Stjórnin hefur á hendi allar framkvæmdir félagsins milli aðalfunda. Aðalfundur ákveður þóknun fyrir störf stjórnar. Hún fær menn sér til aðstoðar við þau störf í þágu félagsins, sem vinna þarf á hverjum tíma og semur við þá um þóknun fyrir. Formaður er fulltrúi félagsins út á við og hefur yfirumsjón með öllum störfum félagsins og fjárreiðum.

Öll veiði í Fljótavík er bönnuð nema með leyfi landeiganda. Landeigendur einir geta leyft utanaðkomandi gestum að veiða. Veiðileyfi fyrir utanaðkomandi er háð því að landeigandinn sem veitir leyfið sé sjálfur viðstaddur meðan veiði stendur yfir. Landeigandi, sem ekki er á staðnum, má ekki veita utanaðkomandi aðilum leyfi til að veiða að honum fjarstöddum.

Veiðirétt í Fljótinu og Reiða eiga allir landeigendur og fjölskyldur þeirra. Veiðiréttur annars staðar í Fljótavík tilheyrir í samræmi við lög landeiganda hverrar jarðar fyrir sig.

#### 7. gr.

Stjórnarmenn skulu víkja sæti við meðferð þeirra mála félagsins sem snerta hagsmuni þeirra eða venslamanna þeirra sérstaklega umfram aðra félagsmenn. Þeir skulu haga störfum sínum þannig að jafnræðis sé gætt meðal félagsmanna. Stjórn félagsins skal gæta andmælaréttar félagsmanns áður en mál sem snertir hagsmuni tiltekins félagsmanns umfram aðra félagsmenn er tekið til afgreiðslu á stjórnarfundum.

Stjórn félagsins skal ætíð gæta þess að mál sé nægjanlega upplýst áður en ákvörðun í því er tekin. Rísi ágreiningur um lögmæti ákvörðunar félagsstjórnar eða fundar í félaginu getur félagsmaður kært ákvörðunina til Fiskistofu. Kærufrestur er þrjú mánuðir frá því ákvörðunin var tekin.

## 8. gr.

Fundi í félaginu skal boða skriflega (með bréfi eða tölvupósti) með dagskrá eigi síðar en 10 dögum fyrir fundardag. Skylt er að boða fundi með ábyrgðarbréfi ef breyta á samþykktum félagsins eða ráðstafa veiði á félagsfundi. Afl atkvæða ræður úrslitum mála á fundum. Þó verður breyting á samþykkt eða arðskrá að hljóta samþykki 2/3 atkvæðisbærra félagsmanna. Nú verður breyting á samþykkt eða arðskrá ekki afgreidd vegna ófullnægjandi fundarsóknar og má þá boða til annars fundar. Á þeim fundi ræður afl atkvæða.

Nú er ráðgert að breyta samþykkt eða arðskrá eða ráðstafa veiði og skal þess getið í fundarboði. Nú fer atkvæðagreiðsla fram á fundi skv. fyrirmælum 7. mgr. 40. gr. laga nr. 61/2006 um lax- og silungsveiði og gildir þá ein eining í arðskrá hjá félagsmanni sem hefur atkvæðisrétt, sem eitt atkvæði, sbr. 1. mgr. 40. gr. sömu laga. Greiða má atkvæði skriflega, enda sé þess getið í fundargerðabók.

Á félagsfundi skal leggja fram skrá yfir atkvæðisbæra félagsmenn. Umboð sem lögð eru fram á fundi skulu skráð í fundargerðabók.

## 9. gr.

Aðalfund skal halda eigi síðar en 1. júní ár hvert. Á aðalfundi skýrir stjórnin frá störfum félagsins á liðnu starfsári og leggur fram tillögur um starfsemi þess á næsta ári ásamt fjárhagsáætlun félagsins fyrir komandi starfsár. Þá skal hún leggja fram endurskoðaða reikninga félagsins og ályktar fundurinn um þá. Aukafundi skal halda eftir þörfum eða ef ¼ félagsmanna æskir þess og tilgreinir fundarefnið.

Dagskrá aðalfundar skal vera sem hér segir:

1. Skýrsla stjórnar.
2. Endurskoðaðir reikningar lagðir fram.
3. Umræður um skýrslu og reikninga
4. Fjárhagsáætlun næsta árs.
5. Breytingar á samþykktum félagsins ef fyrir liggja.
6. Kosning stjórnar og skoðunarmanna, sbr. 5. gr.
7. Ráðstöfun veiðiréttar.
8. Önnur mál.

## 10. gr.

Reikningsár félagsins er almanaksárið. Stjórninni ber að færa reikningana í gerðarbók, sem henni er skylt að halda, svo og samþykktir félagsins, félagaskrá, arðskrá og fundargerðir.

## 11. gr.

Arði af sameiginlegri veiði skal skipt niður á félagsmenn samkvæmt arðskrá. Félagsmenn greiða gjöld til félagsins í sömu hlutföllum og þeir taka arð.

## 12. gr.

Samþykkt þessi staðfestist samkvæmt 39. gr. laga nr. 61/2006 um lax- og silungsveiði með síðari breytingum og birtist til eftirbreytni öllum þeim, sem hlut eiga að máli.

*Fiskistofu, 1. nóvember 2012.*

**Árni Ísaksson,**  
forstöðumaður lax- og silungsveiðisviðs.